



SIARAN AKHBAR

KEMENTERIAN KESIHATAN

**PERUTUSAN
YANG BERHORMAT
DATO SERI SETIA DR HAJI MD ISHAM BIN HAJI
JAAFAR
MENTERI KESIHATAN
SEMPENA HARI JURURAWAT DAN BIDAN
ANTARABANGSA 2025**

12 MEI 2025

**TEMA: “JURURAWAT KAMI. MASA DEPAN KITA.
MENJAGA JURURAWAT MENGUKUHKAN
EKONOMI”**

***“Our Nurses. Our Future. Caring for Nurses Strengthens
Economies”***

“BIDAN: KRITIKAL DALAM SETIAP KRISIS”

“Midwives: Critical in Every Crisis”

1. Setiap tahun, Hari Jururawat Antarabangsa atau *International Nurses Day* (IND) disambut pada 12 Mei dan Hari Bidan Antarabangsa atau *International Day of Midwife* (IDM) disambut pada 5 Mei. Di Negara Brunei Darussalam, Hari Jururawat Antarabangsa dan Hari Bidan Antarabangsa ini digabungkan dan diraikan serentak pada setiap 12 Mei dan ianya dinamakan sebagai Hari Jururawat dan Bidan Antarabangsa atau *International Nursing and Midwifery Day* (INMD).
2. Tema Sambutan Hari Jururawat Antarabangsa pada tahun ini disediakan oleh International Council of Nurses (ICN) iaitu JURURAWAT KAMI. MASA DEPAN KITA. MENJAGA JURURAWAT MENGUKUHKAN EKONOMI (*Our Nurses. Our Future. Caring for nurses strengthens economies*). Tema ini dipilih bagi menekankan tentang peranan penting yang dimainkan oleh tenaga kerja kejururawatan yang sihat dalam mengukuhkan ekonomi, meningkatkan sistem kesihatan dan memastikan hasil yang lebih baik untuk komuniti di seluruh dunia. Manakala tema Hari Perbidanan pada tahun ini adalah BIDAN: KRITIKAL DALAM SETIAP KRISIS (*Midwives: Critical in Every Crisis*).
3. Bidang kejururawatan dan perbidanan adalah tulang belakang kepada penjagaan kesihatan dan adalah satu profesyen yang sangat mulia yang perlu kita lindungi, hormati dan hargai. Peredaran modenisasi

yang serba canggih pada masa ini memerlukan semua jururawat dan bidan untuk menjadi lebih dinamik, berkembang maju bermula daripada penjagaan asas sehingga mengeksploitasi ke peringkat yang lebih tinggi, lebih teknikal dan inovatif.

4. Secara global, tenaga kerja kejururawatan berada di tengah-tengah krisis, iaitu kekurangan kakitangan kronik, keadaan kerja yang tidak selamat, dan gaji yang tidak mencukupi yang menjadi penyebab kemelut seperti keletihan, kemerosotan kualiti kerja, dan penghijrahan profesional ke persekitaran kerja yang lebih selesa. Fenomena ini memberikan implikasi yang sangat mendalam pada sistem kesihatan awam, ekonomi, dan masa depan penjagaan kesihatan. Oleh yang demikian, sempena Hari Jururawat Antarabangsa ini, penggubal dasar perlulah mengambil langkah yang tegas untuk membina dan mengoptimumkan tenaga kerja kejururawatan yang berkekalan, kuat dan mampan.
5. Dalam konteks Negara Brunei Darussalam, beberapa perkara penting telah dan sedang dipertingkatkan, ini termasuklah:

5.1 Menjaga Kesejahteraan Jururawat dan Bidan

Mengutamakan kesejahteraan jururawat memberikan kesan kepada peningkatan kualiti penjagaan, peningkatan

pengekal tenaga kerja, dan mengukuhkan prestasi ekonomi. Jururawat adalah tulang belakang kepada sistem penjagaan kesihatan terutama sekali dalam penjagaan kesihatan asas, kesihatan ibu dan anak, dan pengurusan penyakit kronik. Kementerian Kesihatan akan terus menjaga dan melabur di dalam tenaga kerja kejururawatan, melalui gaji yang berpatutan, sokongan kesihatan mental, dan pembangunan profesional yang berterusan bagi memastikan sistem penjagaan kesihatan di Negara Brunei Darussalam kekal berdaya tahan dan responsif, dan seterusnya dapat melindungi kesejahteraan dan kestabilan negara.

5.2 Memberikan peluang pembangunan Tenaga Kerja

Kementerian Kesihatan juga komited dalam pengukuhan profesion kejururawatan dan perbidanan dengan menyokong jururawat-jururawat dan bidan-bidan untuk mengikuti latihan atau krusus di dalam dan luar negeri, membuat penyelidikan dan melibatkan diri dalam apa jua aktiviti-aktiviti pembangunan yang ada. Hal ini bukan sahaja menyumbangkan kepada pembangunan diri masing-masing malahan dapat meningkatkan hasil penjagaan kesihatan di negara ini.

5.3 Menyediakan persekitaran yang positif dan selamat

Persekitaran tempat kerja yang selamat, menyokong dan positif mampu menyumbang kepada pemberian penjagaan kesihatan yang lebih baik dan berkualiti, pengekalan tenaga kerja yang lebih tinggi dan sistem kesihatan yang lebih kukuh dan berdaya tahan. Hal ini secara kesuluruhannya dapat memberi manfaat kepada masyarakat di negara ini.

6. Sambutan Hari Jururawat dan Bidan Antarabangsa pada tahun ini menyerlahkan kepentingan strategik untuk mengiktiraf, menyokong dan melabur kepada jururawat-jururawat dan bidan-bidan. Mereka ini bukan sahaja dianggap sebagai penyedia penjagaan kesihatan tetapi sebagai ejen utama kepada daya tahan ekonomi, pembangunan negara dan kemajuan sosial.
7. Dalam masa yang sama, saya juga menyeru kepada semua Jururawat dan Bidan di negara ini untuk sentiasa bersabar, memberikan layanan yang sempurna dan mengekalkan dedikasi yang tinggi dalam menjalankan tugas seharian. Kementerian Kesihatan percaya Jururawat dan Bidan yang bertanggungjawab dan prihatin mampu menjadikan sistem kesihatan di negara ini mampan dan berkualiti tinggi yang seterusnya dapat memacu kepada

perkembangan ekonomi dan masyarakat, sesuai dengan tema sambutan '*Our Nurses. Our Future. The economic power of care*' dan *Midwives: Critical in Every Crisis*.

-TAMAT-